

हुणियालि बातोंक बारि मिं परमेश्वरक दर्शन

यौ प्रभु यीशु मसीक शिष्य यहूनाक जरियल लेखी हुणियालि घटनाओंक बारि मिं चिट्ठी छु।

यौ यहूना ऐल पतमुस नामक द्वीप मिं छु, जां कि उकें सजाक तौर मिं धरि रॉखौ। वां परमेश्वर उकें आपण यौ दर्शन दिणई।

यौ बखत विश्वासियोंक लिजी भौत मुश्किलक बखत छी किलैकि उनुमिं सताव हुणौछी। परमेश्वर उनुकें यौ दर्शनल तसल्ली दिंनी कि उनेरि हालत हमेशा यसि नि रवो। परमेश्वर सबनक न्याय करौल और एक नई दुनी बणाल, जां मौत और पाप नि हो, पर उं परमेश्वरक दगाड़ हर बखत रौल।

दुःखक बीच मिं धीरज

(प्रकाशितवाक्य १:४-६)

ऑशिया मिं सात विश्वासियोंक समुदायक लिजी यहूनाक चिट्ठी।

परमेश्वर जो हमेशा छी, ऐल छन, और उणी लै छन, उनर पवित्र आत्मा जो सिंहासनक सामण रुं, और यीशु मसीह जकें परमेश्वरल सब मरी मैसों मिंबे पैली ज्यून करो, और जो पुर दुनियक रॉजोंक रॉज लै छु, उनेरि दया और शांति तुमुमिं हो।

यीशुक बारि मिं गवाही दिणक कारणल मी पतमुस नामक द्वीप मिं बन्द छूं। हमुकें यीशु मिं भरौस करणक कारणल मैसोंक जरियल भौत परेशानी मिली, जस तुमुकें लै। लेकिन हम धीरजल परमेश्वरक राज्यक इंतजार करनू।

सिंहासन मिं भैटी परमेश्वर

(प्रकाशितवाक्य ४:१-११)

एक दिन मिंकेँ यौ दर्शन मिलौ कि स्वर्गक एक द्वार खुलि रौ और एक भुकौरक जसि अवाज मिंकेँ कूणैछी, “आ, यां मेलि आ, मी तुंकेँ दिखूल कि यैक बाद आँब के हवल।”

तब तुरंत परमेश्वरक आत्मा मिं पर ऐ और मील स्वर्ग मिं एक सिंहासन देखौ, और क्वे उमिं बैठि रौ जो रत्नोंक चारि चमकदार छु, और वीक सिंहासनक चारों तरफ हरी चम-चम करणी घाम जस छु। उ सिंहासनक चारों तरफ चौबीस सैप आपण-आपण गद्दी मिं भैटी छी। उनुल सफेद लुकुड़ और सुनाँक मुकुट पैरीं छी। सिंहासन मिंकेँ बिजलि और गर्जनक जसि अवाज उणैछी। वीक सामण सात मशाल जल रई, जो परमेश्वरक सात आत्मा छन। सिंहासनक आँश-पासक फर्श वार-पार देखीणी और चमकदार छी।

सिंहासनक चारों तरफ चार जन्तु छी, जनर अधिल और पछिन आँखै-आँख छी। पैल जीव शेरक चारि, दुसर सांडक चारि, तिसरक मूख मैसक चारि और चौथूँ उड़णिवाँल गरूड़क चारि छी। चारों कै छै-छै फांक छन, और उं भ्यार-भितेर आँखोल भरी छन और रात-दिन लगातार यौ कूनी रुनी, “पवित्र, पवित्र, पवित्र सबों है शक्तिमान प्रभु परमेश्वर, जो छी, जो छन और जो रौल!” जब-जब उं प्राणि सिंहासन मिं भैटी युग-युगों तलक ज्यून रुणिवाँल केँ महिमा, आदर और धन्यवाद दिनी, तब-तब चौबीस सैप सिंहासन मिं बैठिवाँल केँ पैलाग करनी, हमेशा-हमेशा तलक ज्यून रुणिवाँलक अराधना करनी और यौ कून-कूनी सिंहासनक सामण आपण-आपण मुकुट खिति दिनी, “हमर प्रभु परमेश्वर, तुम महिमा, आदर और सामर्थक अधिकारी छा, किलैकि तुमुल सॉर दुनी बणै। तुमरै मंशाल यौ बणी और यैक जनम लै हौ।”

परमेश्वरक न्यायक दिन

(प्रकाशितवाक्य २०:११-१५)

यैक बाद मील एक ठुलौ सफेद सिंहासन और उमिं भैटी परमेश्वर केँ देखौ। धरति और अगाश वीक सामण गैब है ग्याय, और उनर केँ के पत्त नि चल। मील नॉन-ठुल सब मरियों केँ उ सिंहासनक सामण ठाँड़ देखौ। तब

किताब खोली ग्याय, और जीवनकि किताब लै खोली गई। मैसोंक सब काम उं किताबों मिं लिखी छी, और वीक हिसाबल उनर न्याय करी गो।

समुद्रल आपण उं मरियों कै जो उमिं छी, दी दे। तब मौत और अधोलोकल लै आपण मरियों कै दे। और उं सबनक कामोंक हिसाबल हरेकक न्याय करी गो। यैक बाद मौत और अधोलोक द्विनों कै आंगक ताल मिं खिती गो। और जैक नाम जिन्दगीक किताब मिं लेखी नि मिल, उ आंगक ताल मिं खिती गो। यौ दुसेरि मौत छु।

नई दुनी

(प्रकाशितवाक्य २१:१-२७)

तब मील एक नई अगाश और एक नई धरति देखी। पुराण अगाश और पुराणि धरति द्विवै अलोप है गई और समुद्र लै नि रै गोय। मील पवित्र नगर, एक नई यरुशलेम कै परमेश्वरक यांबे अगाश मिं उतरण देखौ, जो आपण दुल्हक लिजी सजाई-धजाई ब्योलिक चारि छी। तब मिंकै सिंहासन बे एक जोरकि अवाज यौ कूण सुणाई पड़ी, “दयखो, ऐल बे परमेश्वरक निवास मैसोंक बीच मिं हवल। उं मैसोंक दगाड़ रौल, और मैस उनार जनता हवाल। परमेश्वर उनर आँखों बे सब आँस लै पौछ द्याल। यैक बाद न मौत रौलि, न शोक, न दुःख और न पीड़, किलैकि पुराणि बात बित गई।” तब सिंहासन मिं भैटी वॉलल कौ, “दयखो, मी सब कुछ नई करणयूं।” यैक बाद उनुल मिधैं कौ, “यौ बातों कै लिखो, किलैकि यौ भरौस करणी और सांचि छन।”

यैक बाद उनुल कौ, “काम पुर है गो। पैली और आखिरी, आदी और अंत मी छूं। मी पाणितिसा कै बिन डबलोंक जिन्दगी दिणी छ्वाय बे पिलूल। जो जितॉल, मी उनुकै यौ सब द्यूल। मी उनर परमेश्वर बणुल, और उं म्यार नॉनतिन हवाल। लेकिन डरपोकों जो भरौस नि करन, नीच, खूनी, ब्यभिचारियों, जाँद-टुन करणियों, द्याप्तोंक पुज करणिवॉलों और हर किसमक झुट मैसोंक अंत यस हवल कि उं सबों कै आंगक ताल मिं खिती जॉल। यौ दुसेरि मौत छु।”

तब एक स्वर्गदूतल म्यर पास ऐबेर कौ, “आओ, मी तुमुकै नई यरुशलेम कै दिखूल।” तब उ स्वर्गदूत मिंकै ठुलौ उंच डॉन मिं लिबेर गो, वांबे वील मिंकै पवित्र यरुशलेम नगरी दिखै, जो स्वर्ग बे उतरणैछी। उ परमेश्वरक महिमाल भरी और किमती मणियोंक चारि चमकणैछी। वीक चारों तरफ

एक ठुली और उंचचि दिवाल छी, जनुमिं बार द्वार छी, और हरेक द्वारक सामण एक स्वर्गदूत ठाँड़ रुंछी। और उं द्वारों मिं इसायलक बार कुलोंक नाम लेखी छी। पूरब, पश्चिम, उत्तर और दक्षिण सब दिशाओं मिं वीक तीन द्वार छी। नगरक दिवालक नींव बार ढुडों मिं ठाँड़ छी और उनुमिं यीशुक बार शिष्योंक नाम लेखी छी।

जो म्यर दगाड़ बात करणौछी वीक पास नगर, वीक द्वार और वीक दिवाल कैं नाँपणक लिजी सुनक एक गज छी। जब स्वर्गदूतल उकैं नाँपौ तब वीक लम्बाई-चौड़ाई और उचाई सब द्वी हजार द्वी सौ बीस किलोमीटर निकलौ। जब उ स्वर्गदूतल उ दिवालकि नांप ले, तब वीक मोटाई पैसठ मीटर निकई। यौ दिवाल भौत किमती ढुडोंल बणी छी, जो भौत चमकछी। यौ दिवालकि नींव बार अलग-अलग किसम-किसमाक किमती ढुडोंल बणी छी। यैक बार फाटक बार मोतियोंल बणी छी, हरेक फाटक यक्कै मोतील बणी छी। और नगरक बाँटों मिं शुद्ध सुन लागीं छी, और उं कांचक चारि चमकदार छी।

मील वां क्वे मंदिर नि द्यख, किलैकि सबों है ठुल प्रभु परमेश्वर और यीशु मसीह मैसोंक बीच मिं छी, यैक लिजी मैसों कैं मंदिरक के जरूवत नि छी। उ नगर कैं सूर्ज और चन्द्रमांक उज्यावक जरवत लै न्है, किलैकि परमेश्वरक महिमा उनर दगाड़ छु, और यीशु उ नगरक उज्याव छु। दुनियाँक सब देशोंक मैस वीक उज्याव मिं रौल और धरतिक रॉज आपण भेट लिबेर वां आल। वीक द्वार कभै बन्द नि हो, और न वां कभै रात ह्वेलि। सब देशोंक मैस आपण धन-दौलत लिबेर वां आल।

लेकिन न तो उमिं क्वे अपवित्र, खराब काम करणी, झुट बुलाणी नि जै सकन, पर बस वीं जै सकनी, जनर नाम परमेश्वरक जीवनक किताब मिं लेखी छन।

परमेश्वर मैसोंक बीच मिं रौल

(प्रकाशितवाक्य २२:१-५)

यैक बाद स्वर्गदूतल मिं परमेश्वरक सिंहासन बे बगणी एक भौत साफ गाड़ दिखै, जैक पाणि जीवन दिंछी। उ यौ नगरक बीचों-बीच बगछी। और वीक किनार मिं द्विवै तरफ एक-एक जीवनक बोट छी, जैमिं बार किसमाँक फल छी और उमिं हर म्हेण मिं फल लागछी, और यौ बोटाँक पातोंल हरेक

देशोंक मैसोंक इलाज करी जांछी। वां कवे लै फिटकार नि रओ। परमेश्वर और यीशुक सिंहासन वां हवल, और उनार सेवक उनेरि अराधना करॉल। मैस परमेश्वर कैं आमण-सामण देखॉल, और परमेश्वरक नाम उनर कपाव मिं लेखी हवल। वां फिर कभै रात नि हो, और उनुकैं बत्ती या सूर्जक उज्यावक जरवत नि पड़ो। किलैकि प्रभु परमेश्वरक उज्याव उनुमिं हवल, और उं सब हमेशा-हमेशा तलक राज करॉल।

प्रभु यीशु जल्दी आल

(प्रकाशितवाक्य २२:६-२१)

स्वर्गदूतल मिधैं कौ, “यौ सब बात भरौस करणी और सांचि छन। प्रभु परमेश्वरल आपण दूत कैं भेजि रॉखौ जैल उं आपण सेवकों कैं उ घटनाओं कैं दिखै सको जो जल्दी हुणिवॉल छु।”

यीशुल कौ, “द्यखो, मी जल्दी उणयूं। धन्य छु उ मैस जो यौ पुस्तककि बातों कैं मानुं।”

मी यहूनाल यौ बातों कैं देखौ और सुणौ। जब मील देख-सुण हैछी, तब जो स्वर्गदूतल मिं कैं यौ सब बातों कैं दिखैबेर सुणाछी, मी वीक खुटॉन मिं चौड़ हबेर पैलाग करणक लिजी खिती पड़यूं। लेकिन वील मिधैं यस कौ, “तुम यस झन करो। मी लै तुमर और तुमर भै नबियोंक और उं सब मैसोंक जो यौ किताबकि बातों कैं माननी उनर चारि परमेश्वरक एक सेवक छूं। तुम केवल परमेश्वरक अराधना करो।” फिर वील मिधैं यस कौ, “तुम यौ पुस्तकक भविष्यबाणियोंक बातों कैं गुप्त नि धरिया, किलैकि यौ सब हुणक बखत नजिक छु। पापि आजि पाप करनै रओ, नीच मैस नीचै बणि रओ। धर्मी, धार्मिक और पवित्र, पवित्र बणि रओ।”

प्रभु यीशु कूंनी, “द्यखो, मी जल्दी उणयूं। तुमर इनाम म्यर पास छु। और मी हरेक मैसोंक कामोंक हिसाबल उनर न्याय करुल। पैली और आखिरी, आदी और अंत मी छूं।”

धन्य छन उं जो आपण लुकुड़ों कैं ध्वे लिनै। उं जीवनक बोटक फलक हकदार हवाल। और वीक द्वारोंक बाँट नगर भितेर आल। लेकिन कुकरमी, तांत्रिक, खूनी, द्याप्तोंक पुज करनी, झुट लगूणी, यौ सब भ्यारै रौल। मील विश्वासियोंक समुदायों कैं यौ बात बतूणक लिजी तुमर पास आपण दूत भेजौ। मी दाउदक वंशज छूं, और चमकदार रातियक तॉर छूं।

आत्मा और ब्योलि द्विवै कूनी, “आओ!” और जो सुणुं, उ लै कवो,
“आओ!”¹

जो पाणितिसा छु, आओ, बिन डबलोक जीवन दिणी पाणि पियो!

जो मैस यौ पुस्तकक भविष्यबाणी कै सुणनी, मी, यहूना, उं सबों कै खबरदार करनू, कि अगर क्वे यैमिं के बढ़ाल, तब परमेश्वर लै वीक लिजी यौ पुस्तक मिं लिखी परेशानियों कै बढ़ै द्याल। और अगर क्वे यैमिंबे के काँटॉल, तब परमेश्वर यौ पुस्तक मिं लेखी जीवनक बोट और पवित्र नगर बे वीक भाग काटि द्याल।

यौ बातोंक गवाही दिणी यीशु मसीह यस कूं, “मी जरूड़ जल्दी उणयूं।”
हे प्रभु, तुम आपण कूणक अनुसार झट्ट करिया!

प्रभु यीशुक किरपा तुम सबों मिं बणी रओ।

¹ ब्योलि - यीशु मसीक विश्वासियोंक समूहों कै यां यीशुक ब्योलि कूनी।